

## **Johresbricht vo de Untergruppe Mamis ond Chind 2015**

Euses Vereinsjohr hemmer am 15. April 2015 i de Frühlingsferien mit em Kinonomittag gstartet. Mer hend 31 Chind dörfe begrüsse. Die beliebti Popcornüberraschig het natürlich ou zom Programm ghört. So hemmer de deheimbliebne Chind e glungnigi Abwechslig chöne biete.

Am 6. Mai hemmer för e Anlass Schweiz bewegt e Bauernolympiade i de Turnhalle duregführt. Es het 6 verschidini Pöschte wie Eierlauf, Traktorfahren, usw. gä. Vorallem die fascht läbensechti Chue vor de Turnhalle wo mer het chöne melken het d Chind zom staune brocht. 77 Chind ond ihri Mamis hend eus gholfe Bewegungsminuten för Neuendorf z sammle. Als Belohning hets nachhär no feini Getränk ond Chüeche gä.

Die allzyt beliebti Rösslifahrt esch am 19. August of em Programm gstande. Be ned ganz sonnigem Wetter si mer mit 2 vollbsetzte Wäge is alte Forsthaus gfare. Nach emene feine Zvieri hemmer eus de am spötere Nomittag wieder of e Heiweg gmacht.

Wie vöu choschtet das oder wetsch du mit mer tusche? So oder ähnlich hets am 16. September am Flohmärt im Primarschulhaus tönt. D Chind hend am Bode of Deckine Spielsache, Bücher, Cd s usw. abote. D Priese hend d Chind selber chöne bestimme ond e esch ou fliessig gmärtet worde. I de Kaffistube het mes ou gnosse ond mängs Chind esch am Nomittag zfriede ond fröhlich hei.

E Gruppe vo Fraue ond Chind het sich am Morgen vom 14. Oktober bi de Minigolfanlage för de Herbstausflug troffe. Me esch gmütlich vo dort zum Spielgruppenplatz i Wald glofe. Bi chüelere Temperature het me sich am Fүүr gärn ufgwärmt ond derzu no e feini Wurscht brötlet. D Chind hend de Plausch gha im Wald z spiele.

Jedes Jahr biete mer jeweils en Bastel oder Backnomittag a. Am 2. Dezember sind 72 Chind i d Kochschule cho Grittibänz backe. Jedes Chind het e Schachtel verziert ond so sis Bänzli sicher hei brocht.

Ou das Jahr hemmer 24. Adventsfenster dörfe bestaune. Es esch immer wieder z erkenne wie mer vöu Kreativität ond vöu Liebi zom Detail Bilder ond Dekorationen entstünd. Mer bedanke eus bi aune no einisch recht herzlich wo mer gmacht hend. Mer wörde eus freue wenn sich wieder 24 bastelfreudigi Fraue wörde melde. D Lichte esch hüt Obe im Umlauf.

De letschti Anlass vo dem Vereinsjahr het letscht Mittwoch no einisch mit emene Kinonomittag statt gfunde. Neu hemmer d Räumlichkeiten im Feuerwehrmagazin dörfe benütze. 63 Chind hemmer zo de Filme Schellenursli und Nachts im Museum dörfe begrüsse.

Euse nöchschi Anlass Sponti Clowns findet am 6. April im Sitzungszimmer i de Turnhalle statt. Es Theaterstück mit de Chindergartenkind.

Of em Jahresprogramm 2016 sind wiederum alli Anlässe vo eus mit emene Smily kennzeichnet. Es hange vor de Anläss ou immer Plakat im Dorf ond es wärde im Chindsgi ond de Schuel Flyer verteilt.

Euse Dank goht ou das Jahr a alli Froue wo a eusne Anlässe teilnänd ond eus tatkräftig unterstütze. Danke för s Vertraue wo dir eus schänket indem ihr euchi Chind i eusi Obhut gänd.

Zom Abschluss möchti no gärn of Krabbel ond Zwärgligruppe hinweisen. Die findet jeweils jede zwöite Zieschtig im Gemeindehaus statt. Willkommen sind alli Chind vo 0-4 Jahr. S nöchschte Träffe wäri am 22. März. Bim Buffet vorne hets no Flyer mit nöchere Angaben zom mitnäh.

I wönsche euch no e gmütliche Obe...